

## PRIMER CART NI BCUAA SAN JUANY

<sup>1</sup> Cartré ná par cayacdixtee lot pur tuby ni agac rbez desde anste ni gurixti guichliu.

Abindiagniny ne agunánny, agunázaacniny ne abguaaldniny. Laaniy rguaadny guelnabány,

<sup>2</sup> ne abeedny lo guichliu. Agunánny ne dunní nan testigu ax cadixteen lot pur laany ni rguaadny guelnabány par chazy. Laaniy ni agac rbeznény Dios ax beedny lo guichliuré.

<sup>3</sup> Ningui cadixteen lot ni agunán ne ni abindiagní, par gaczacti tubyzi cun dunní zec ni nan tubyzi cun Xtadni Dios ne cun Lliinny Jesucrist.

<sup>4</sup> Cadixteen de cosré lot pur cartré te par tubylote yalo izaclaazní.

<sup>5</sup> Ndé ná ni bseed Jesucrist dunní, anre ax cadixteenni lot dec Dios ná bieeny ne laany xíteete duldti rbeznény.

<sup>6</sup> Belati iniin dec tubyzi nan cun Dios ne chiy zonuugacní nez mal, ax dixúizní zeclí pur ni rniin ne ni rdxanní.

<sup>7</sup> Per belati zonuun bieeny xte Dios zec ni rbezny sin duld ax tubyzic nan cun de sáan. Chiy riny xte Lliinny Jesucrist ná ni rsía dunní xte irate de xtuldni.

<sup>8</sup> Belati iniin dec quit xi duldti rdxanní, lagacqui dunní rdxanní engany dunní, ax quit rbeznétiny didxldí xte Dios.

<sup>9</sup> Per belati ixubduldni de xtuldni lo Dios, dunni nánni dec zunquipacny zec ni rniiny, zunny perdón de xtuldni ne síany dunni xte irate mal.

<sup>10</sup> Belati iniin gady xi duldti idxanni, niy zelo xtiidxni dec dixúzy Dios nan bñnduld ax quit roldilaaztin xtiidxny.

## 2

<sup>1</sup> De lliinia, cacuáa de cosré par laat par quit gúnti duld. Per belati nuu ni gún duld, dunni rdxapni tuby ni inii pur dunni lo Xtadni Dios, ne laaniy Jesucrist ni quit guuti dxi baany duld.

<sup>2</sup> Pur guelguty xte Jesucrist anuu perdón pur de xtuldni. Ne gati pur de xtuldzitin sino que pur irate xtuld bñnguichliu.

<sup>3</sup> Dunni nanldín belati cadxanni zec ni rnabee Dios, niy zelo dec ardxambeenny.

<sup>4</sup> Per belati nuu ni rnii: “Nare rumbiia Dios”, ne nicli quit rcuadiagbi xtiidxny, laab dixúizbi te pur gati didxldíti ná ni rniib.

<sup>5</sup> Per ni rcuadiag xtiidxny, guldípacbi rialo rcaazbiny. Ziy xquel nánni dec arbeznény.

<sup>6</sup> Tutix ni rnii dec arbeznéb Dios ná par ibánybi zec ni gubány Jesucrist.

<sup>7</sup> Zec ni rcaaza laat, de diidx ni caniia laat anre, gati diidx cubytini, lagac de xtiidx Jesucrist ni abindiagti desdi guloni. De diidxtiziacquiy caniia laat.

<sup>8</sup> Per caniiani laat zectiziac tuby mandamient cuby pur ni zecli pur Crist ne pur laat ríeny dec ziy ná didxldí, te pur azelaa cabicá ni ná mal ax arienru cún ni ná güen.

<sup>9</sup> Belati nuu ni rnii azenuu xnez Dios ne chiy rdxichnégacbi saa bnietchi, laab zeczi zenuub nez mal.

<sup>10</sup> Elqui ni rcaaz saa bnietni zenuuchbi xnez Dios ne aquit cuenzi senciyti gúnbi duld.

<sup>11</sup> Per ni rdxichnégac saa bnietni, laabiy nabánybi nez mal, ne zenuub nez malqui sin quit gántib calí nezqui zéb pur ni abcaiybi zecpacza tuby bniety ni quit rianlo.

<sup>12</sup> Cacuaa cartré par iratecti de lliinia, te pur aguc perdón de xtuldti pur guelrnabee xte Jesucrist.

<sup>13</sup> Cacuaa cartré par laat, de bingul, te pur arumbeet Jesucrist, laany ni agac rbezny desde anste ni gurixti guichliu. Ziyza cacuaa cartré par laat ni gady gacti bingul, te pur abaanti gan rzut lo de mal ni zéed pur bindxab.

Abcuáa de diidxré par laat, de bniiny, te pur arumbeet Xtadni Dios.

<sup>14</sup> Ziyza abcuáa de diidxré par laat, de bingul, te pur arumbeet Jesucrist, laany ni agac rbezny desdi anste ni gurixti guichliu. Ne ziyza abcuáa de diidxré par laat ni gady gacti bingul, pur ni rzutipti ne guldíacti zenuut xtiidx Dios, ne pur ni abaanti gan rzut lo de mal ni zéed pur bindxab.

<sup>15</sup> Quit sebylaaztit de mal xte binguichliu nicliza de ni nuu lo guichliu. Belati nuu ni mazru rcaaz guichliuré, laab quit rcaaztib Xtadni Dios.

<sup>16</sup> Te pur nic tuby de mal ni nuu lo guichliuré quit zéedti pur Dios sino que pur lagacqui binguichliu. Ne de ndé ná de mal xte binguichliu: guelrun zectisy ni ná xgabni, guelrzebylaaz gap

irate ni rianlob ne guelrzubyya lagac laani pur de cos ni rápbi.

17 Per guichliu zuu chi ldullni cun tod irate de mal ni nuu loni. Per ni nabány zec ni rcaaz Dios, laab zapbi guelnabány par chazy nez lony.

18 De lliinia, nare rniia laat azedyiub ldull guichliu te pur laat abindiagtí dec ná par idiaca anticrist, ne anre zienzi de ni rdxichné Crist abdiaca. Pur ningui, nánni dec azedyiub ldull guichliu.

19 De ni rdxichné Jesucrist, lagac lo de saniroldilaazni Jesucrist bdiadeb. Per ni nápacni gati saatindeb te pur belrulati sáandeb, ziiandeb lo de saniroldilaazni Jesucrist. Per guc ziy te par bíenzaac dec gati iratideb rac sáan.

20 Crist abn#dxny laat Spíritu Sant ax pur laany iratectí anánti cún ni ná didxldí.

21 Quit cacuaatia de diidxré lot pur quit gánti cún ni ná didxldí sino que pur ni anántini, ne laat nánti nic tuby dixú quit xo gueedti lo didxldíqui.

22 Anre, ¿túy bindixú? Bindixú ná ni rnii dec Jesús gati Cristiny. Ne laabi y náb zecac anticrist pur ni quit reldilaazbi Xtadni Dios nicliza Lliinny.

23 Te pur tutix ni rnii dec Jesucrist gati Lliin Diostiny, laab quit rumbeetib Xtadni Dios. Per ni rnii dec Jesucrist ná Lliin Dios, laab rumbeebi Xtadni Dios.

24 Pur ningui, gulchané cuend de diidx ni bindiagtí desde chi guzulo reldilaazti Jesucrist. Ne belati laat zenuut de diidx ni bindiagtí desde guloqui, ax zelaac rbeznét Xtadni Dios cun Lliinny Jesucrist.

<sup>25</sup> Ne ni gunii Jesucrist iguaadny dunní ná guelnabány par chazy nez lo Dios.

<sup>26</sup> Cacuáa de diidxré par laat pur de ni cayun pur gún engany laat.

<sup>27</sup> Per laat rbeznét Spírítu Sant ni bn#dx Jesucrist laat, ax quit rquiinti tu iseed laat. Te pur lagac Spírítu Sant rliuu laat irate, ne púrzi didxldí ná ni rseedny laat gati dixú. Pur ningui, gulbány zec ni rnabee Spírítu Sant te par chalaa gacti tubyzi cun Crist.

<sup>28</sup> Anre de lliinia, nare rniia laat gulchalaaxnez Crist, te par quit idxibni chi idiacány nicl#za quit itiulótin lony chi gueedny.

<sup>29</sup> Laat anánti dec Dios irate runny zec ni riáld ax náza par gacheet dec irate de ni run zec ni riáld, laadebiy nádeb lliin Dios.

### 3

<sup>1</sup> Gulgaany xgab xi guroo ná guelrcaaz xte Xtadni Dios par cun dunní. Niyla relee lán de lliin Dios. Ne gati láiztin ziy sino que lliinpacny dunní. Per de ni quit zenuu xnez Dios, quit rumbeetideb dunní zec de lliin Dios pur ni quit rumbeedeb Dios.

<sup>2</sup> Zec ni rcaaza laat, nare rniia laat: anan lliin Dios. Ne masqui gady gacheetin xáy gacni chi gueed Jesucrist stuby, per nanldín dec zacni zectisy ni nány te pur chiyruy iguiaan xapacqui nány.

<sup>3</sup> Ne irate de ni reldilaaz gac ziy, rundeb pur ibánydeb nania nez lony zec ni rbezny sin duld.

<sup>4</sup> Per irate de ni quit zéne cuend gún zec ni rnabee Dios, laadeb cayundeb duld. Te pur duld ná guél quit run zec ni rnabee Dios.

<sup>5</sup> Laat nánti dec Jesucrist beedny lo guichliu par idzicány xtuld bniety, ne laany quit guuti dxi ne quitza chúuti dxi gúnny duld.

<sup>6</sup> Pur ningui, de ni ná tubyzi cun Jesucrist rundeb pur quit gúndeb duld. Per irate de ni cuntispac run duld, quit rnabeetiny laadeb nicliza quit rumbeetidebny.

<sup>7</sup> De lliinia, nare rniia laat quit tu isaanti gún engany laat, te pur ni cayun zec ni rcaaz Dios, laab naniab nez lony zec ni nania Jesucrist nez lony.

<sup>8</sup> Per bniety ni aquit xi rziiienti run duld, laabi y xpiny bindxab te pur bindxabtizla run duld desde gulo. Ne Jesús Lliin Dios beedny lo guichliu parpacla baanny gan lo guelrnabee xte bindxab.

<sup>9</sup> Pur ningui, nic tuby ni azenuu xnez Dios quit relaati run duld pur ni arbeznéb Dios, ax aquit riáldti gúnbi duld pur ni anáb lliin Dios.

<sup>10</sup> Güeldíte tudey de lliin Dios ne tudey de lliin bindxab, te pur tutix ni quit run zec ni rcaaz Dios o quit rcaazzacbi de saa bniety ax gati lliin Diosti laab.

<sup>11</sup> Ne laat abindiagti de xtiidx Dios desde gulo dec ná par icaazni de sáan.

<sup>12</sup> Quit náti par idxanni zec ni baany Caín: bsaanbi gunabee bindxab laab ax gudinxúb betsbí. Caínqui baanbi ziy pur ni baanbi púrzi de ni ná mal ne betsbí ax baany púrzi ni ná güen.

<sup>13</sup> Pur ningui de saniroldilaazni Jesucrist, quit xi sacantit belati rdxichné binguichliu laat pur ni

azenuut xnez Dios.

<sup>14</sup> Dunnì nánnì aquitru nátin zec tuby binguty par Dios sino que ardxapni guelnabány nez lony pur ni rcaazni de saa bnietni. Per ni quit rcaaz saa bnietni, laab zeczi náb zec tuby binguty par Dios.

<sup>15</sup> Irate ni rdxichné saa bnietni, laab náb zecac tuby ni rguinxú biny. Ne laat nánti dec tuby ni caguinxú biny quit naptib guelnabány par chazy nez lo Dios.

<sup>16</sup> Dunnì anánnì xiy guelrcaaz pur ni guty Jesucrist pur dunnì. Anre ziyzaquiy dunnì pur guelrcaaz ax quit xi gúnti masqui axt gatyni pur de sáan.

<sup>17</sup> Per belati tubyni quit xi runlieedxtib lo guichliuré chiy rguiaab tuby ni cayunlieedxni ne quit gacnéb laab ax, ¿xólesa iniib dec zéneb cuend guelrcaaz xte Dios?

<sup>18</sup> Pur ningui de lliinia, nare rniia laat, gati de diidxziti iniin rcaazni de sáan sino que yíany guelrcaazqui pur ni rdxanni.

<sup>19</sup> Te ziy xquel ax anánnì cacuadiagquin xtiidx Dios ne nanchuun dec cadxanquin zec ni riáld nez lony.

<sup>20</sup> Per belati acadxanni ziy ne zélaa rziienni quit cadxantin zec ni riáld, ná par chonén cuend dec Dios mazru guuroo nány que dunnì ne laany nány irate.

<sup>21</sup> Pur ningui zec ni rcaaza laat, nare rniia laat: belati rziienni dec güenqui cadxanni, ax nanchuun cadxanquin zec ni riáld nez lo Dios.

<sup>22</sup> Ziy xquel, laany sguaadny irate ni inaabniny pur ni rcuadiagni diidx rdxanni zec ni rnabeeny,

ne pur ni rdxanni pur idxanni zec ni rdxalaazny.

<sup>23</sup> Ne ni rnabeeny idxanni ná dec choldilaazni dec Jesucrist ná Lliin Dios, ne icaazni de saa bnietni zec ni gunabeeny dunni.

<sup>24</sup> De ni rcuadiag diidx run zec ni rnabee Dios, laadeb rbeznédeb Dios ne laany rbeznény laadeb. Ne nánni dec arbeznénny pur Spíritu Sant ni abniidxny dunni.

## 4

<sup>1</sup> Zec ni rcaaza laat, nare rniia laat quit chaldilaaztit tutix de ni rnii canii xtiidx Dios. Nidootellga gulgachezaac la xtiidx Diosquipacqui y rueeb o la gati laaniy. Te pur lo guichliuré zienzi de bindixú candza rniideb dec caniideb xtiidx Dios.

<sup>2</sup> Anre par gacheet tú guldípac ruee xtiidx Dios, güeldíte irate ni reldilaaz dec Jesucrist beedny lo guichliu zecac tuby bniety guichliu. Ni reldilaaz ziy, laabi y rbeznéb Spíritu Sant xte Dios.

<sup>3</sup> Per ni quit reldilaaz dec Jesús Lliin Dios beedny lo guichliu, laabi y quit rbeznétib Spíritu Sant xte Dios. Chiy laazabi y ni rdxichnéb Crist. Laat abindiagti ná par gueed anticrist lo guichliu, ne desde anre acayac zec ni ná xgabbi, zienzi de ni rdxichné Crist anuu lo guichliuré.

<sup>4</sup> Per laat, de lliinia, anát de lliin Dios ax de ni rdxichné Crist aquit xo gúntideb gan laat, te pur mazru guroo guelrnabee napny laany ni rbeznény laat que ni rbezné de ni zenuu nez mal lo guichliuré.

<sup>5</sup> De ni rdxichné Crist, lo guichliutisré zenelaazdeb ax púrzi pur de ni nuu lo guichliuré

ruedeb. Chiy de ni quit reldilaaz Crist ax run cuend xtiidxdeb.

<sup>6</sup> Per dunnì anan xpiny Dios, ax de ni rumbee Dios rcuadiagdeb ni rdxueen. Chiy de ni quit rumbee Dios nicli quit rundeb cuend xtiidxni. Ziy xquel racbeen tú rbezné Spíritu Sant ni rliuu dunnì didxldí ne túza rbezné spírit ni rliuu púrzi dixú.

<sup>7</sup> Zec ni rcaaza laat, nare rniia laat ná par icaazni de saa bnietni te pur guelrcaazqui zéedny pur Dios. Irate ni rcaaz saa bnietni, lliin Diosqui laab ne rumbeeczacbi Dios.

<sup>8</sup> Ne ni quit rcaaz saa bnietni zeczi gady gumbeetib Dios te pur, pur Dios zéed guelrcaaz.

<sup>9</sup> Dios bliuuny guelrcaaz xtenny par cun dunnì te pur masqui tubyzi Llinny Jesucrist, per bxiaaldny laany lo guichliu par idxapni guelnabány nez lo Dios pur laany.

<sup>10</sup> Guelrcaaz ná dec gati duntin guzulo rcaazni Dios sino que laany guzulo rcaazny dunnì. Ningui bxiaaldny Llinny Jesucrist par gutyny pur de xtuldni ax anuu perdón par dunnì.

<sup>11</sup> Pur ningui zec ni rcaaza laat, nare rniia laat zec ni rcaaz Dios dunnì ziyza ná par icaazni saa bnietni.

<sup>12</sup> Masqui ruteete gady tu iniáti Dios, per belati icaazni de saa bnietni niy zelo dec rbeznéni Dios ne guldíni zonuun guelrcaaz xtenny.

<sup>13</sup> Dunnì nánni dec rbeznén Dios ne laany rbeznézacny dunnì pur ni abnìdxny Spíritu Sant xtenny dunnì.

<sup>14</sup> Ne dunnì de apóstol agunán Jesucrist Llin Dios, ax cadixteen dec Xtadni Dios bxiaald laany

lo guichliuré par gudillyny pur xtuld irate bniety guichliu.

<sup>15</sup> Tutix ni rnii dec Jesucrist ná Lliin Dios, laab rbeznécbi Dios ne laany rbeznény laab.

<sup>16</sup> Dunní agucbeen ne roldilaazni dec rcaaz Dios dunní, ne pur laany zéed guelrcaaz ax ni nabány cun guelrcaazqui rbeznécbi Dios ne laany rbeznény laab.

<sup>17</sup> Belati guldípacni zonuun guelrcaaz xte Dios lo guichliuré, a xíteete quitru rdxibtin par dxi ni gún Dios guelgurtisy xtenny pur ni anan tubyzi cun Dios zec ni ná Crist tubyzi cun laany.

<sup>18</sup> Rut nuu guelrcaaz aquítiru guelnadxiby. Te pur ni guldípac zenuu guelrcaaz xte Dios, aquítiru xi rdxibtib. Per ni quit zenuu guelrcaazqui ax rdxibbi pur ni runbi xgab xi castigu yáldbí. Pur ningui, belati nuu ni rdxiby ziy, esqui quit guldítib zenuub guelrcaaz.

<sup>19</sup> Dunní rcaazni Dios, te pur nidoote laany rcaazny dunní.

<sup>20</sup> Belati nuu ni rnii dec rcaazbi Dios ne chiy rdxichnégacbi de saa bnietbi, laab naizbi tuby bindixú. Te pur de saa bnietclab ni rguaab quit rcaazbi, latixcu Dios icaazbi ne gady iniábny.

<sup>21</sup> Lagac laany guniiny: Elqui ni rcaaz Dios ná par icaazbi de saa bnietbi.

## 5

<sup>1</sup> Tutix ni reldilaaz dec Jesús ná Crist ni bxiaald Dios, laab nácbi lliin Dios. Ne bniety ni rcaaz Xtadni Dios ziyza rcaazbi iraru de lliinny.

<sup>2</sup> Chi rcaazni Dios ne rdxanni zec ni rnabeeny idxanni ax nánni rcaazquin iraru de lliinny.

<sup>3</sup> Guelrcaaz Dios ná gún bniety zec ni rnabeeny, ne xíteete nagánti gún bniety zec ni rnabeeny.

<sup>4</sup> Te pur irate ni a ná lliin Dios arelee rzudeb lo de mal ni nuu lo guichliuré. Ne pur guelreldilaaz dec Jesús ná Crist ax arelee rzun lo de mal ni nuu lo guichliu.

<sup>5</sup> Te pur ni reldilaaztisa dec Jesús ná Lliin Dios, laab relee rzub lo de mal ni nuu lo guichliuré.

<sup>6</sup> Ne Jesucristé beedny lo guichliu. Chiy brubnisny ne bxíiny riny xtenny, gati brubniszitiny sino que ziyza bxíiny riny xtenny lo cruzy. Lagac Spíritu Sant ná testigu xte de cosré ne laany púrzi didxldí rniiny.

<sup>7</sup> Te pur chon testigu nádeny llayabaa: Xtadni Dios, Jesucrist ne Spíritu Sant ax iyontecny ná tubyzi Dios.

<sup>8</sup> Ne ziyza nuu chon testigu lo guichliuré: Spíritu Sant, chiy ni brubnis Jesucrist cun ni bxíiny riny xtenny lo cruzy, ne iyontecny tubyzi ni zelodeny.

<sup>9</sup> Anre belati ni rniicla binguichliu dunni roldilaazni, ax mastecru rquiiny choldilaazni ni gunii Dios pur Lliinny Jesucrist, te pur mazru sac xtiidxny.

<sup>10</sup> Ni reldilaaz Jesucrist Lliin Dios, reldilaazquib ni gunii Dios pur laany. Per ni quit reldilaaz Dios, laab zelo xtiidxbi dec dixúizny pur ni quit reldilaazbi ni guniiny pur Lliinny Jesucrist.

<sup>11</sup> Ne ni gunii Dios ná dec abnidxny dunni guelnabány par chazy, ne guelnabányqui zéedny

pur Lliinny Jesucrist.

<sup>12</sup> Ax ni ná tubyzi cun Jesucrist Lliin Dios, laab napquib guelnabányqui nez lo Dios. Per ni quit ná tubyzi cun laany, quit naptib guelnabányqui.

<sup>13</sup> Cacúa de cosré par laat ni reldilaazti Jesucrist Lliin Dios par gacheet dec napti guelnabány par chazy nez lo Dios.

<sup>14</sup> Dunní sin dxiby rnaabní lony pur ni nánni dec runny cuend xtiidxní belati canaabniny ni ná volunta xtenny.

<sup>15</sup> Ne zec ni nánni dec run Dios cuend xtiidxní chi xi rnaabní lony, ziyza nanchuun dec snídxny de ni rnaabniny.

<sup>16</sup> Belati tubyní nánbi dec cayun tuby de sáan duld ni quit riáldti guelguty, ná par inaabbi lo Dios pur laab te gaadbí guelnabány nez lony belati quit ná duldqui ni riáldbí guelguty. Te pur nuu duld ni riáld guelguty ne quit caniitia inaabti pur ni abaany duldqui.

<sup>17</sup> Irate de mal ná duld, per nuu duld ni quit riáldti guelguty.

<sup>18</sup> Dunní nánni dec de ni a ná lliin Dios aquit senciyti gúndeb duld. Te pur Jesucrist Lliin Dios ná ni rcualo laadeb ax aquit rnabeeti bindxab laadeb.

<sup>19</sup> Nánni dec xpiny Dios dunní. Per irateru de binguichliu ni quit ná xpiny Dios, bindxab ná ni rnabee laadeb.

<sup>20</sup> Ne ziyza nánni, Jesucrist Lliin Dios abeedny lo guichliuré ax bxfalny xquelrienni par rdxambeen mermerpac Dios. Dunní rbeznénny pur Lliinny Jesucrist ne laatisny nány Dios, ax pur laany nuu guelnabány par chazy.

<sup>21</sup> De llinia, gulcualo cun iralozy de ni rlilo  
bniety ná dios. Amén.

**Xtiidx Dios cun ditsa**  
**New Testament in Zapotec, San Juan Guelavía**  
**(MX:zab:Zapotec, San Juan Guelavía)**

copyright © 1995 Wycliffe Bible Translators, Inc.

Language: Zapotec, San Juan Guelavía

Translation by: Wycliffe Bible Translators, Inc.

Zapotec, San Juan Guelavía

zab

Mexico

**Copyright Information**

© 1995, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, San Juan Guelavía

**© 1995, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 12 Jun 2026 from source files dated 29 Jan 2022

4b6898c2-1ae7-5b64-b781-1a33bd63388f